

## FLORUS

## CARMINA (66 v.)

F1 v.1 Ego nolo Caesar esse,  
2 ambulare per Britannos  
3 [LACUNE]  
4 Scythicas pati pruinas.

## DE QUALITATE VITAE

F2 v.1 Bacche, vitium repertor, plenus adsis vitibus,  
2 effluas dulcem liquorem, comparandum nectari,  
3 conditumque fac vetustum, ne malignis venulis  
4 asperum ducat saporem, versus usum in alterum.

F3 v.1 Mulier intra pectus omnis celat virus pestilens ;  
2 dulce de labris loquuntur, corde vivunt noxio.

F4 v.1 Sic Apollo, deinde Liber sic videtur ignifer :  
2 ambo sunt flammis creati prosatique ex ignibus ;  
3 ambo de donis calorem, vite et radio, conferunt ;  
4 noctis hic rumpit tenebras, hic tenebras pectoris.

F5 v.1 Quando ponebam novellas arbores mali et piri,  
2 cortici summae notavi nomen ardoris mei.  
3 Nulla fit exinde finis vel quies cupidinis :  
4 crescit arbor, gliscit ardor : animus implet litteras.

F6 v.1 Qui mali sunt non fuere matris ex alvo mali,  
2 sed malos faciunt malorum falsa contubernia.

F7 v.1 Sperne mores transmarinos, mille habent offucia.  
2 Cive Romano per orbem nemo vivit rectius :  
3 quippe malim unum Catonem quam trecentos Socratas.

F8 v.1 Tam malum est habere nummos, non habere quam malum est ;  
2 tam malum est audere semper quam malum est semper pudor ;  
3 tam malum est tacere multum quam malum est multum loqui ;  
4 tam malum est foris amica quam malum est uxor domi ;  
5 nemo non haec vera dicit, nemo non contra facit.

F9 v.1 Consules fiunt quotannis et novi proconsules ;  
2 solus aut rex aut poeta non quotannis nascitur.

## DE ROSIS

F10 v.1 Venerunt aliquando rosae. Per veris amoeni  
2 Ingenium una dies ostendit spicula florum,

3 altera pyramidas nodo majore tumentes,  
 4 tertia jam calathos, totum lux quarta peregit  
 5 floris opus. Pereunt hodie nisi mane leguntur.

## DE ROSIS

F11 v.1 A, quales ego mane rosas procedere vidi !  
 2 Nascebantur adhuc neque erat par omnibus aetas.  
 3 Prima papillatos ducebat tecta corymbos,  
 4 altera puniceos apices vunbone levabat,  
 5 tertia jam totum calathi patefecerat orbem,  
 6 quarta simul nituit nudati germine floris.  
 7 Dum levat una caput dumque explicat altera nodum,  
 8 sic, dum virgineus pudor exsinuatur amictu,  
 9 ne pereant lege mane rosas : cito virgo senescit.

## DE ROSA

F12 v.1 Aut hoc risit Amor aut hoc de pectine traxit  
 2 purpureis Aurora comis aut sentibus haesit  
 3 Cypris et hic spinis insedit sanguis acutis.

## DE ROSIS

F13 v.1 Hortus erat Veneris, roseis circumdatus herbis,  
 2 gratus ager dominae, quem qui vidisset amaret.  
 3 Dum puer hic passim properat decerpere flores  
 4 et velare comas, spina libavit acuta  
 5 marmoreos digitos : mox ut dolor attigit artus  
 6 sanguineamque manum, tinxit sua lumina gutta.  
 7 Pervenit ad matrem frendens defertque querellas :  
 8 "Unde rosae, mater, coeperunt esse nocentes ?  
 9 Unde tui flores pugnare latentibus armis ?  
 10 Bella gerunt mecum. Floris color et cruor unum est ! "

## DE MUSIS

F14 v.1 Clio saecla retro memorat sermone soluto.  
 2 Euterpae geminis loquitur cava tibia ventis.  
 3 Voce Thalia cluens soccis dea comica gaudet.  
 4 Melpomene reboans tragicis fervescit iambis.  
 5 Aurea Terpsichorae totam lyra personat aethram.  
 6 Fila premens digitis Erato modulamina fingit.  
 7 Flectitur in faciles variosque Polymnia motus.  
 8 Uranie numeris scrutatur sidera mundi.  
 9 Calliope doctis dat laurea sarta poetis.